

**ВО ЧЕТВЕРГ 6-Й СЕДМИЦЫ ПО ПАСХЕ  
ПРАЗДНУЕМ ВОЗНЕСЕНИЕ ГОСПОДА БОГА И СПАСА НАШЕГО ИИСУСА  
ХРИСТА.**

**В СРЕДУ ВЕЧЕРА**

Час 9-й трипсалмный. По начале глаголет чтец трисвятое, и до недели 8-я во всяком церковном пении.

**НА МАЛЕЙ ВЕЧЕРНИ,**

На Господи возвах: поставим стихиры 4, глас 6-й:

Господь вознесся на небеса, да послет Утешителя миру: небеса уготоваша престол Его, облацы восхождение Его. Ангели дивятся, Человека зряще превыше себе. Отец ждет, Егоже в недрах имать Соприсносущна: Дух же Святый велит всем ангелом Его: возмите врата князи вапша, вси языцы восплещите руками, яко взыде Христос, идеже бе первее.

Господи, Твоему Вознесению удивившася херувими, зряще Тебе Бога на облацех восходяща, на них сидящаго и славим Тя, яко блага милость Твоя, слава Тебе.

На горах святых зряще Твое Вознесение Христе, Сияние славы Отчи, воспеваем Твой светообразный лица зрак, кланяемся Страстем Твоим, почитаем Воскресение, славное Вознесение славяще: помилуй нас.

Господи, смотряния совершив таинство, поим Твоя ученики на гору Елеонскую, возносился еси, и се твердь небесную прошел еси, мене ради Обнищавый по мне и возшед отонудуже не разлучился еси, Всесвятаго Твоего Духа низпосли, просвещающа души наша

Слава, и ныне: глас тойже:

Господи, апостоли яко видеша Тя, на облацех возносима, рыданием слез, Жизнодавче Христе, скорби исполняеми, рыдающе глаголаху: Владыко, не остави нас сирых, за милосердие возлюбил еси рабы Твоя, яко Благоутробен: но послы якоже обещал еси нам, Пресвятаго Твоего Духа, просвещающа души наша. [Дважды].

Прокимен дне.

На стиховне стихиры, глас 1-й

Возшед на небеса, отонудуже и сошел еси, не остави нас сирых Господи: да придет Твой Дух, нося мир миру, покажи сыном человеческим дела силы Твоя, Господи Человеколюбче.

Стих: **Вси языцы восплещите руками, воскликните Богу гласом радования.**

**В**озшел еси Христе к Безначальному Отцу Твоему, неописанных Его недр не разлучивыйся, и прилог силы хваления трисвятаго не прияша, но единого Сына и по вочеловечении познаша Тя Господи, едиnorodна Отцу: во множестве щедрот Твоих помилуй нас.

**Стих:** **Взыде Бог в воскликновении, Господь во гласе трубне.**

**А**нгели Твои Господи, апостолом глаголаху: мужие галилейстии, что стоите, зряще на небо? Сей есть Христос Бог, Вознесыйся от вас на небо, Той придет паки, имже образом видесте Его идуща на небо: послужите Ему в преподобии и правде.

**Слава, и ныне, глас 2:**

**Р**одился еси яко Сам восхотел еси, явился еси яко Сам изволил еси: пострадал еси плотию Боже наш, из мертвых воскресл еси поправ смерть. Вознеслся еси во славе, всяческая исполняяй, и послал еси нам Духа Божественнаго, еже воспевати и славити Твое Божество.

**Н**ыне отпуцаеши: **Трисвятое. По Отче наш.**

**Отпустительный тропарь, глас 4-й:**

**В**ознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира.

**Таже ектения малая. И отпуст.**

**Службу Миней рядоваго святаго, случившагося в праздник Вознесения, поем на повечерии.**

## НА ВЕЛИЦЕЙ ВЕЧЕРНИ.

По предназначительном псалме кафисмы не глаголем.

На Господи возвах: поставим стихов 10. И поем стихирь самогласны 5, повторяюще я. Глас 6-й:

Господь вознесся на небеса, да послет Утешителя миру: небеса уготоваша престол Его, облацы восхождение Его. Ангели дивятся, Человека зряще превыше себе. Отец ждет, Егоже в недрах имать Соприсносушна: Дух же Святый велит всем ангелом Его: возмите врата князи вашя, вси языцы воспещите руками, яко взыде Христос, идеже бе первее. [Дважды.]

Господи, Твоему Вознесению удивихся херувими, зряще Тебе Бога на облацех восходяща, на них сидящаго и славим Тя, яко блага милость Твоя, слава Тебе. [Дважды.]

На горах святых зряще Твое Вознесение Христе, Сияние славы Отчи, воспевает Твой светообразный лица зрак, кланяемся Страстем Твоим, почитаем Воскресение, славное Вознесение славяще: помилуй нас. [Дважды.]

Господи, апостоли яко видеша Тя, на облацех возносима, рыданием слез, Жизнодавче Христе, скорби исполняеми, рыдающе глаголаху: Владыко, не остави нас сирых, за милосердие возлюбил еси рабы Твоя, яко Благоутробен: но послал якоже обещал еси нам, Пресвятаго Твоего Духа, просвещающа души наша. [Дважды.]

Господи, смотрения совершив таинство, поим Твоя ученики на гору Елеонскую, возносился еси, и се твердь небесную прошел еси, мене ради Обнищавый по мне и возшед отонудуже не разлучился еси, Всесвятаго Твоего Духа низпосли, просвещающа души наша. [Дважды.]

Слава, и ныне: глас тойже.

Недр Отческих не разлучся, Сладчайший Иисусе, и с земными яко Человек пожив, днешь от горы Елеонския Вознеслся еси во славе, и падшее естество наше милостивно Вознес, Отцу спосади еси. Темже небеснии безплотных чинове, чудеси удивляющися, ужасохуся ужасом, и трепетом содержиши, Твое человеколюбие величаху. С нимиже и мы земнии, еже к нам Твое низхождение, и еже от нас Вознесение славословяще, молимся глаголюще: ученики, и Рождшую Тя Богородицу, радости безчисленные Исполнивый во Твое Вознесение, и нас сподоби избранных Твоих радости, молитвами их, великия ради Твоя милости.

Вход. Прокимен дне.

### Пророчества Исаиина чтение. [Глава 2.]

**Т**ако глаголет Господь: будет в последние дни явлена гора Господня, и дом Божий на версех гор, и Вознесется превыше холмов, и придут на ню вси языцы. И пойдут людие мнози, и рекут: приидите взыдем на гору Господню, и в дом Бога Иаковля, и возвестит нам путь Свой, и пойдём по нему.

### Пророчества Исаиина чтение. [Глава 62.]

**Т**ако глаголет Господь: поидите и видите враты Мои, и уготовите путь Мой, и путь творите людем Моим, и камения от пути разместите, Вознесите знамение на языки. Се бо Господь сотвори слышано даже до последних земли: рцыте дщери Сионове, се Спаситель твой приходит, имея с Собою мзду, и дело Его пред лицом Его. И прозовет я люди святы, избавлены от Господа: ты же наречешия взысканный град, и неоставленный. Кто Сей пришедый из Едома, обращение риз Его от Восора? Сей красен во одежди Своей, вопиет с крепостию велиею: Аз глаголю правду и суд спасения. Почто Ти обращены ризы, и одежды Твоя яко от истоптания точила исполнены истоптания? Точило истоптах Един, и от язык несть муж со Мною. Милость Господню помянух, добродетели Господни во всех, имиже нам воздавает. Господь, Судия благий дому Израилеву, наносит нам по милости Своей, и по множеству правды Своея. И рече: не людие ли Мои, чада не отвергнут ли ся? И бысть им во спасение от всякия скорби их. Не ходатай, ниже ангел, но Сам Господь спасе их: за еже любити их, и щадети их, Сам избави их, и восприят их, и Вознесе их во вся дни века.

### Пророчества Захариина чтение. [Глава 14.]

**Т**ако глаголет Господь: се день грядет Господень, и станут нозе Его в день оный на горе Елеонстей, прямо Иерусалима, от восток солнца. И в день оный изыдет вода жива из Иерусалима, пол ея в море первое, и пол ея в море последнее: в жатву и в весну будет тако. И будет Господь Царь по всей земли, в день оный будет Господь един. Имя Его едино, окружающее всю землю и пустыню, от Гавы даже до Реммона, противу хребту Иерусалимлю: и Вознесется, и на месте пребудет, от врат Вениаминовых, даже до места дверей первых, даже до врат угольных, и даже до столпа анамеилева, даже до подточилий царевых, обитают в нем: и анафема не будет ктому, и вселится Иерусалим надейся.

### На литии стихирь самогласны. Глас 1-й:

**В**озшед на небеса, отонудуже и сошел еси, не остави нас сирых Господи: да приидет Твой Дух, нося мир миру, покажи сыном человеческим дела силы Твоя, Господи Человеколюбче.

**В**озшел еси Христе к Безначальному Отцу Твоему, неописанных Его недр не разлучивыйся, и прилог силы хваления трисвятаго не прияша, но единого

Сына и по вочеловечении познаша Тя Господи, едиnorodна Отцу: во множестве щедрот Твоих помилуй нас.

**А**нгели Твои Господи, апостолом глаголаху: мужие галилейстии, что стоите, зряще на небо? Сей есть Христос Бог, Вознесыйся от вас на небо, Той придет паки, имже образом видесте Его идуща на небо: послужите Ему в преподобии и правде.

**Глас 4:** **Е**гда пришел еси на гору Христе Елеонскую, Отчее совершити благоволение, ужасошася небеснии ангели, и устрашишася преисподнии. Предсташа же ученицы с радостию трепетни, яко глаголах еси им, яко престол же готовяшася против облак ждущий: врата же небо отверзшее доброту являше, и земля сокровища открывает, Адамову схождению яко познатися, и паки восхождению. но стопы убо возвышашася, якоже руце, уста же вельми благословляху, якоже слышашася, облак подъемляше, и небо внутрь Тебе прият. Дело сие Господи соделал еси великое и преславное, во спасение душ наших.

**Н**изшедшее естество Адамово, в дольнейшыя страны земли, Боже новосотворивый Собою превыше всякаго начала и власти, возвел еси днесь: яко бо возлюбив спосадил еси, якоже помиловав соединил еси Себе, яко соединивый спострадал еси, яко безстрастен пострадав, и прославил еси. Но безплотнии, кто есть Сей, глаголаху красный Муж? но не человек точию, Бог же и Человек, совокупленно и являемо. Темже удивлени ангели, во одеждах летающе окрест учеников, друзии же стояще вопияху: мужие галилейстии, Иже от вас отиде, Сей есть Иисус Человек Бог. Бог Человек паки придет, Судия живых и мертвых, верным же даруяй грехов прощение и велию милость.

**Е**гда Вознеслся еси во славе Христе Боже, учеником зрящим, облацы подымаху Тя с плотию, врата взяшася небесная, лик ангельский радовашася с веселием, горнейшыя силы зовяху глаголюще: возмите врата князи вашия, и внидет Царь Славы. Ученицы же дивящася глаголаху: не разлучися нас Пастырю Добрый, но посли нам Духа Твоего Пресвятаго, наставляюща, и утверждающа, и просвещающа, и освящающа души наша.

**Слава и ныне: глас 4-й:**

**Г**осподи, таинство еже от веков сокровенное и от родов исполнив яко Благ, пришел еси со ученики Твоими на гору Елеонскую, имея Рождшую Тя творца и всех Содетеля: Той бо в страсти Твоей матерски паче всех болезновавшей, подобаше и славою плоти Твоея, премногия насладитися радости. Еяже и мы причащающася, еже на небеса восходом Твоим Владыко, великую Твою милость на нас бывшую славим.

**На стиховне стихиры самогласны, глас 2-й:**

**Р**одился еси яко Сам восхотел еси, явился еси яко Сам изволил еси: пострадал еси плотию Боже наш, из мертвых воскресл еси поправ смерть.

Вознеслся еси во славе, всяческая исполняяй, и послал еси нам Духа Божественнаго, еже воспевати и славити Твое Божество.

**Стих:** **Вси** языцы восплещете руками, воскликните Богу гласом радования.

**В**осприемлему Тебе Христе от горы Масличныя, силы зряще, друг другу вопияху: Кто есть Сей? И глаголет к ним: Сей есть Державный и Сильный, Сей есть Сильный в брани, Сей есть воистинну Царь Славы. И почто Ему червлены ризы? Из Восора приходит, еже есть плоти. Ты же Сам яко Бог одесную сед величества, послал еси нам Духа Святаго, да наставит и спасет души наша.

**Стих:** **Взыде Бог** в воскликновении, **Господь** во гласе трубне.

**В**ознеслся еси во славе на горе Масличней Христе Боже, пред Твоими ученики, и сел еси одесную Отца, всяческая исполняяй Божеством, и послал еси им Духа Святаго, просвещающа и утверждающа, и освящающа души наша.

**Слава и ныне: глас 6-й:**

**Взыде Бог** в воскликновении, **Господь** во гласе трубне, еже Вознести падший образ Адамов, и послати Духа Утешителя, еже освятити души наша.

**Таже, Ныне** отпускаеши: **И трисвятое.**

**На благословении хлебов, тропарь праздника, глас 4-й:**

**В**ознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира. **[Трижды]**

**А идеже несть всенощнаго: по Ныне** отпускаеши: **тропарь праздника единожды. На повечерии по Достойно: кондак праздника.**

**Полунощницу** поем по обычаю с кафисмою. По 1– м трисвятом, вместо, **Се жених: глаголем тропарь праздника.** По 2-м трисвятом, вместо, **Помяни, Господи, яко Благ: глаголем кондак праздника. Таже, Господи помилуй. 12. И отпуст. Молитвы, Помяни Господи, в надежди: не глаголем. утрени начало по обычаю. И абие чтец глаголет: Приидите поклонимся: трижды. и обычныя два псалма, 19 и 20. и шестопсалмие.**

## ВО ЧЕТВЕРГ 6-Й СЕДМИЦЫ ПО ПАСХЕ НА УТРЕНИ

На **Бог** Господь: тропарь праздника, глас 4-й:

**В**ознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира. [Трижды]

По 1-м стихословии седален, глас 1-й:

**Подобен:** Камени запечатану:

**А**нгелом дивящимся восхода странному, и учеником ужасающимся страшному взытия, возшел еси со славою яко Бог, и врата Тебе взявша Спасе. Сего ради силы небесныя дивляхуся вопиюще: слава низхождению Твоему Спасе, слава царствию Твоему, слава Вознесению Твоему, Едине Человеколюбче.

Слава, и ныне: тойже.

По 2-м стихословии седален, глас 3-й:

**Подобен:** Красоте девства:

**П**ревечный Бог и безначальный, еже восприят естество человеческое, обоготворив тайно днесь Вознесе. Ангели предтекуще апостолом показоваху Сего идуща на небеса славою мноюю, Томуже поклонившися глаголаху: слава Богу Вознесшемуся.

Слава, и ныне: тойже.

**Полиелеи и Величание:** Величаем Тя, \* Живодавче Христе, \* и почитаем еже на Небеса \* с пречистою Твоею Плотию \* Божественное вознесение.

**Псалом избранный:** Все языцы воспещите руками, воскликните Богу гласом радования.

По полиелеи седален, глас 5-й:

**Подобен:** Собезначальное Слово:

**С**опедый с небесе на земная, и долу лежащий во адове стражи, совоскресивый яко Бог Адамов зрак, Вознесением Твоим Христе на небеса возвед, престолу Отческому Твоему соседителя соделал еси, яко милостив и Человеколюбец. [Дважды.]

Степенна, а антифон 4-го гласа.

Прокимен. глас 4-й: Взыде Бог в воскликновении, Господь во гласе трубне.

Стих: Все языцы восплещете руками, воскликните Богу гласом радования.

Всякое дыхание:

Евангелие от Марка, зачало 71:

**В**о время оно воскрес Иисус заутра, в первую субботу, явися прежде Марии Магдалини, из неяже изгна семь бесов. Она же шедши возвести с Ним бывшим, плачущимся и рыдающим. И они слышавше, яко жив есть, и виден бысть от нея, не яша веры. По сих же двема от них грядущема явися инем образом, идущема на село. И та шедша возвестиста прочим: и ни тема веры яша. Последи же возлежащим им единомунадесяте явися, и поноси неверствию их и жестосердию, яко видевшим Его воставша не яша веры. И рече им: шедше в мир весь, проповедите Евангелие всей твари. Иже веру имет и крестится, спасен будет, а иже не имет веры, осужден будет. Знамения же веровавшим сия последуют: именем Моим бесы ижденут; языки возглаголют новы; змия возмут; аще и что смертно испиют, не вредит их; на недужныя руки возложат, и здрави будут. Господь же убо, по глаголании Его к ним, вознесся на небо, и седе одесную Бога. Они же изшедше проповедаша всюду, Господу поспешствующу и слово утверждающую последствующими знаменьями. Аминь.

Воскресение Христово: [единожды], Псалом 50.

Слава: глас 2-й: Молитвами апостолов:

И ныне: Молитвами богородицы:

Таже, стих: Помилуй мя Боже, по велицей милости Твоей:

И поем настоящий самогласен, глас 6-й:

**Д**несь на небесех горния силы наше естество зряще, дивящися странного образа восходу, недоумевахуся друг ко другу глаголюще: кто Сей пришедый? Видяще же своего Владыку, небесная врата взяти повелеваху: с нимиже непрестанно воспоим с плотию отонуду паки Грядущаго, яко Судию всех и Бога всесильна.

Каноны: Глас пятый, со ирмосы на 8: И глас четвертый, на 6.

Канон, творение Иоанна монаха. Глас 5-й:

Песнь 1.

**Ирмос:** Спасителю Богу \* в мори люди немокрыми ногами наставльшему, \* и фараона со всевоинством потопльшему, \* Тому Единому поим: \* яко прославися.

**В**оспоим вси людие, на рамах херувимских Вознесшуся со славою Христу, и спосадившему нас одесную Отца, песнь победную: яко прославися.

**Х**одатая Богу и человеком Христа, лица ангельстии видевше с плотию в вышних удивляхуся, согласно же воспеваху песнь победную: яко прославися.

**Я**вльшемуся Богу на горе Синайстей, и закон давшему боговидцу Моисею, от горы Елеонския Вознесшемуся плотию, Тому вси воспоим: яко прославися.

**Богородичен:** Пречистая Мати Божия, Воплощенного от Тебе, и от недр Родителя неотступльшаго Бога непрестанно моли, от всякаго обстояния спасти, яже созда.

#### Другий канон господина Иосифа, глас 4.

**Ирмос:** Отверзу уста моя ...,

**В**оскресл еси тридневен, по естеству безсмертный, и явился еси единонадесятым, и всем учеником, и востекл еси Христе ко Отцу, облаком носимь всех Творче.

**В**опиет явственнo поя Давид богодохновенный, взыде Господь к небесным, в воскликновении и трубы шуме, и к началосветному Отцу доспе.

**Слава:** Состаревшийся, Господи, мир многими грехми, обновив страстию Твоею и востанием Твоим, возшел еси носимь облаком к пренебесным: слава славе Твоей.

**И ныне:** **Богородичен:** Владыку родила еси всех, всенепорочная Владычице, страсть вольную приимшаго, и возшедша к Своему Отцу, Егоже не остави, аще и плоть взят.

**Катавасия:** Божественным покровен, медленозычный мраком, \* извитийствова Богописанный закон: \* тину бо оттряс очесе умнаго, \* видит Сущаго, \* и научается Духа разуму, \* хваля Божественными песньми.

#### Песнь 3.

**Ирмос:** Силою Креста Твоего Христе, \* утверди мое помышление, \* во еже пети и славити \* спасительное Твое Вознесение.

**В**озшел еси Жизнодавче Христе ко Отцу, и Вознесл род наш Человеколюбче, неизреченным благоутробием Твоим.

**Ч**ини ангельстии Спасе, человеческое естество видевше совосходящее Тебе, непрестанно удивляеми воспеваху Тя.

**У**жасахуся ангельстии лица Христе, зряще Тя с телесем Вознесшася, и воспеваху святое Твое Вознесение.

**Е**стество человеческое Христе, тлением падшее возставил еси, и восходом Твоим Вознесл еси, и с Собою нас прославил еси.

**Богородичен:** Моли непрестанно Чистая, Произшедшаго от ложеши Твоих, избавитися прелести диаволи, поющим Тя Матерь Божию.

Ин.

**Ирмос:** Твоя песнословцы Богородице ...,

**В**озмите врата небесная, се прииде Христос Царь твари, в тело оболкся земное, горнейшим глаголаху силам дольнейшья.

**В**зыскав Христе, прельщеннаго прелестию змиевою Адама, яко в сего оболкийся, возшел еси, и сел еси одесную, яко сопрестолен Отцу, поющым ангелом Тебе.

**Слава:** Земля празднует и ликует, радуется и небо, Вознесением днесь Творца твари, предъявленно соединившаго разстоящаяся хотением.

**И ныне: Богородичен:** Смерти родивши Разрушителя, Единого безсмертнаго Бога, Дево Мати Всечистая: Того присно умоли, умерщвляющья моя страсти уморити, и спасти мя.

**Катавасия:** Разверзе утробы нечадствовавшия узы, \* досаду же неудоботерпиму благочаdstвующия, \* едина молитва пророчицы древле Анны \* носящия дух сокрушен, \* к Сильному, и Богу разумов.

**Седален, глас 8. Подобен: Премудрости:**

**В**сед на облаки небесныя, оставив мир сущым на земли, возшел и сел еси одесную Отца, яко Единосущен Сему сый и Духу. Аще бо и во плоти явился еси, но непреложен пребыл еси: темже чаеши совершения конец, судити грядый на землю миру всему. Правосуде Господи, пощади души наша, прегрешений оставление даруя, яко Бог милостив, рабом Твоим.

**Слава, и ныне: тойже.**

**Песнь 4.**

**Ирмос:** Услышах слух силы Креста, \* яко рай отверзся им, \* и возопих: \* слава силе Твоей Господи.

**В**ознесся еси во славе, ангелов Царю, Утешителя нам от Отца послав. Темже вопием: слава Христе Вознесению Твоему.

**Я**ко взыде Спас ко Отцу с плотию, удивившася ангельская воинства, и возопиша: слава Христе Вознесению Твоему.

**А**нгельския силы горнейшим вопияху: врата возмите, Христу нашему Царю, Егоже воспеваем вкупе со Отцем и Духом.

**Богородичен:** Дева роди, и матерняя не позна: но Мати убо есть, Девою же пребысть, Юже воспевающе, радуйся Богородице, взываем.

Ин.

**Ирмос:** Седяй во Славе ...,

**И**исус Жизнодавец прием, ихже возлюби, на Елеонскую гору восходит, и сих благослови, и облаком носимь Отчая недра доспе, яже никакоже бе оставил.

**Мир** весь празднует видимый и невидимый: в радости ангели ликуют и человецы, славословяще непрестанно Вознесение, плотию Соединившагося нам благостию.

**Слава:** Разрушивый державу смерти яко безсмертный Господи, безсмертие всем даровал еси Человеколюбче, и Вознеслся еси во славе, зрящим Тя честным учеником Иисусе всесильне.

**И ныне: Богородичен:** Блаженно чрево Твое Всенепорочная бысть: чрево бо адово преславно истощившаго, несказанно вместити сподобилася еси: Егоже моли спасти нас поющих Тя.

**Катавасия:** Царю царей, Яковый от Яковаго един Слове \* произшедый, от Отца безвиновнаго, \* равномошнаго Твоего Духа \* апостолом истинно послал еси, \* яко Благодетеля поющим: \* слава державе Твоей Господи.

### Песнь 5.

**Ирмос:** Утренююще вопием Ти \* Господи, спаси ны: \* Ты бо еси Бог наш, \* разве бо Тебе иного не знаем.

**И**сполнив веселия всяческая Милостиве, к горним силам с плотию пришел еси.

**А**нгельския силы вземлема Тебе видевшие врата, взываху, Царю нашему, возмите.

**А**постоли видевшие возвышаема Спаса, с трепетом взываху Царю нашему: слава Тебе.

**Богородичен:** Деву по рождестве поем Тя Богородице, Ты бо Бога Слова плотию мирови родила еси.

### Ин.

**Ирмос:** Ужасошася всяческая ...,

**У**мертвив смерть Твоею смертию Господи, взял ихже возлюбил еси, возшел еси на Масличную гору святую, и оттуду востекл еси Христе к Твоему Родителю, облаком носимь.

**С**транно Твое рождество, странно Твое воскресение, странно и страшно Твое Жизнодавче, еже от горы Божественное Вознесение, еже изобразуя Илия четвероконный восхождаше, воспевая Тя Человеколюбче.

**Слава:** Зрящим апостолом вещаху ангели: мужие галилейстии, что чудитесь Вознесению Жизнодавца Христа: Сей придет паки на землю судити миру всему, яко Судия праведнейший.

**И ныне: Богородичен:** Деву сохранив Тя по рождестве нетленну, восходит Христос ко Отцу, Богородительнице, Егоже не остави, аще и плоть прият из Тебе, мысленную же и одушевленную, за милость неизреченную.

**Катавасия:** Решительное очищение грехов, \* огнедохновенную примите Духа росу, \* о чада светообразная церковная. \* Ныне от Сиона бо изыде закон, \* языкоогнеобразная Духа благодать.

Песнь 6.

**Ирмос:** Обыде мя бездна, \* гроб мне кит бысть, \* аз же возопих к Тебе Человеколюбцу, \* и спасе мя десница Твоя Господи.

**В**зыграшася апостоли, зряще на высоту днесь Зиждителя вземлема, упованием Духа, и страхом зовяху: слава восходу Твоему.

**П**редсташа ангели, вопиюще Христе учеником Твоим: имже образом видесте Христа восходяща с плотию, паки приидет Праведный всех Судия.

**Я**ко видеша Тя Спасе наш небесныя силы, на высоту вземлема с телом, зываху, глаголюще: велико Владыко, человеколюбие Твое.

**Богородичен:** Купину Тя неопалимую, и гору, и лествицу одушевленную, и дверь небесную достойно славим Марие славная, православных похвало.

Ин.

**Ирмос:** Божественное сие и всечестное ...,

**Д**а капают нам свыше облацы веселие вечное, Христос бо, облаком яко херувимы носимый, к Своему Отцу восходит днесь.

**П**лоти явився подобием, прежде разстоящаяся собрал еси во едино Человеколюбче, и Вознесся еси Щедре в небесная, зрящим Тя учеником Твоим.

**Слава:** Что червлены ризы плоти соединившагося дебельству? Святии ангели Христа зряще вещаху, страсти честныя Божественныя носяща образы.

**И ныне:** Богородичен: Поем Отроковице зачатие, поем Твое неизреченное рождество, имже избавихомся Чистая тли и озлобления, и мрачнаго адова затворения.

**Катавасия:** Очищение нам Христе и спасение Владыко, \* возсиял еси от Девы, \* да яко пророка от зверя морскаго персей Иону, \* от тли исхитиши всего Адама \* всеродна падшаго.

Кондак самогласен, глас 6:

**Е**же о нас исполнив смотрение, и яже на земли соединив Небесным, Вознесся еси во славе Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.

**Икос:** Яже земли на земли оставившии, яже пепельная персти уступающии, приидите воспрянем, и на высоту возведем очи и мысли, вперим виды, вкупе

чувства, на небесная врата смертнии, нещумим быти в Масличной горе, и взирати на Избавляющаго на облацех носима. Отонуду бо Господь на небеса востече, и тамо даролюбезны дары раздая апостолом Своим, утешив я яко Отец, и утвердив я, наставив яко сынов, и рече к ним: не разлучаюся вас, Аз есмь с вами, и никтоже на вы.

**Синаксарь на Вознесение Господа Бога и Спаса нашего Иисуса Христа.**

**Стихи:** Одесную сел еси Отца Слове:

**Стихи:** Веру учеником известншую показавый.

**В** тойже день, в четверток шестыя недели по Пасце, Вознесение празднуем Господа Бога и Спаса нашего Иисуса Христа. Понеже бо со ученики прежде страсти пребывая, Всесвятаго Духа обеща пришествие, рек: полезно есть, да Аз иду: аще бо Аз не иду, Утешитель не приидет. И паки: егда же приидет Он, научит вас на всю истину. По воскресении же из мертвых, во днех четыредесятих являся им, не вкупе, но особопребыванием ядый с ними и пия, известнейшее воскресение представляя. Конечнее многа о Царствии Божии обетовав, заповедаше сим от Иерусалима не отлучатися, но тамо пребывати, Пресвятаго Духа пришествия ждати, и Тем крещаемым: водою бо бяше и единою прежде крещение от Иоанна, аще и послежде Елифаний Кипрский повествова: яко Богослов убо Иоанн Богородицу крести, Петр же и той и прочыя апостолы. Заповеда же им пребывати во Иерусалиме, да тамо прежде проповедь Евангелиа известится, да не како в чуждая отшедше места, удобно оболгани будут, и яко должно бяше, яко воином неким отсюду уготовитися оружием Духа, и тако на брань поити враг Христовых. Но понеже время наста Вознесения, возводит убо их на гору Елеонскую: нарицается же сице, зане множайшими маслинами насаждена бе. И глаголав им о еже в конце сего проповедания: еше же и о непостижимом Своем Царствии в будущем, понеже и онех не искушати Его хотящих зряще, сущей тамо и Пречистой Его Матери, приставляет ангелы им, на небеса восхождение показующыя. И зрящим убо взятся от среды их, облаку Онаго подымшу, и тако от ангел предсылаемь, повелевающих друг другу небесных дверей взятие, и дивящихся еже от кровей плоти Его червленному, взыде и седе одесную Отца, обожив плоть и дерзну глаголати, сотворив сию купно божественную, еюже мы примирихомся, древней вражде разрушившейся. Апостолом убо ангели в виде мужей предстапа глаголюще: мужие галилейстии, что стоите дивящесе, и на небо взирающе? Сей Егоже видите с плотию Бога Иисуса, Сей приидет паки с плотию яве: обаче не якоже первее, убозе же и молчаливне, но со славою великою, якоже ныне зрите от ангел провождаема. Тогда апостоли еже взирати оставльше, возвратишася от горы Елеон: близ же сия есть от Иерусалима две тысящи и четыредесять ножных стоп, разстоящи ей: се бо есть субботе путь. Сице же узаконено бысть Моисеем на толико стоп в субботу ходити, занеже и сень свидения, толицеми

стопами ногу бяше отстоящи от иудейскаго полка. Возможно бо бе неким тамо в субботу ходити поклонитися, и не вящшее шествие протязати, сего ради наречеса и субботы путь. Мнится же неким отсюду, яко и Христово Вознесение в субботу бысть, обаче погреша. Возвращеса же апостоли внидоша в горницу, в нейже беша сошедша с мироносицами женами, и Материю Слова, постом и молитвами, и молением упражняющеса, и нашествия Всесвятаго Духа ожидающе, якоже бе обещание. Вознесыйся во славе Христе Боже, помилуй нас. Аминь.

### Песнь 7.

**Ирмос: В** печи огненной \* песнословцы \* спасый отроки, \* благословен Бог отец наших.

**На** облацех света Вознесыйся, и спасый мир, благословен Бог отец наших.

**На** раму Спасе, заблудшее взял естество, вознесся, Богу и Отцу привел еси.

**Возшедый** во плоти к безплотному Отцу, благословен Бог отец наших.

**У**мерщвленное наше грехом естество взял, Твоему свойственному Отцу Спасе привел еси.

**Богородичен: От** Девы родился, Юже Богородицу соделал еси, благословен Бог отец наших.

### Ин.

**Ирмос: Не** послужиша твари ...,

**С**ветлый Тя Свет суца, подъят облак Господи, от земли паче ума восприемлема и небеснии собори восхвалиша со апостолы, глаголюще: Боже благословен еси.

**Р**укама вси радующеса воспещим, Вознесением Христовым, и воскликнем: взыде Бог во гласе трубне, и седе одесную, яко сопрестолен Отцу во веки.

**Слава: П**оя древле Моисей великий, взываше: да поклонятся восходящу Христу небеснии ангели, яко всех Царю, Емуже зовем: отцев Господи и Боже благословен еси.

**И ныне: Богородичен: О** чудес преславных! Како вместила еси Бога невместимаго богорадованная, плотию обнищавшаго, со славою мноюю в небесная Вознесшаго днесь, и оживившаго человеки?

**Катавасия: С**огласная возшуме органская песнь, \* почитати златосотворенный бездушный истукан: \* Утешителя же светоносная \* благодать почествует, еже вопити: \* Троице Единая, равносильная, безначальная, \* благословена еси.

### Песнь 8.

**Ирмос:** Из Отца прежде век рожденного Сына, и Бога, \* и в последняя лета воплощенного от Девы Матере, \* священницы пойте, \* людие превозносите во вся веки.

Во двою существу возлетевшаго Жизнодавца Христа на небеса со славою, и Отцу соседящаго, священницы пойте, людие превозносите во вся веки.

От работы идольския тварь избавившаго, и представившаго ту свободну Твоему Отцу, Тебе Спасе поем, и Тебе превозносим во вся веки.

Своим схождением низложившаго супостата, и Своим возшествием Вознесшаго человеки, священницы пойте, людие превозносите во вся веки.

**Богородичен:** Херувимов превышшая явилася еси Богородице Чистая, во чреве Твоем сими Носимаго носившая: Егоже со безплотными, человецы славословим во вся веки.

Ин.

**Ирмос:** Отроки благочестивыя ...,

Явишася умове апостолом в Вознесении, и вещаху: что взирающе стоите дивящися? Сей восходяй в небесная, приидет и паки судити иже на земли человеком, Судия сый Един.

Дадим Богу величие, хвалы согласие воскликнем, воспоем, ликуим, руками же воспоем: взыде Бог наш на небеса от земли, ангелом, архангелом поющым Сего, яко Владыку и Творца всех.

Благословим Отца, и Сына, и Святаго Духа, Господа.

Взятся превыше ангел естество наше, древле отпадшее, и на престоле посаждено бысть Божественне, паче смысла: приидите торжествуим и воззовем: Господа пойте дела, и превозносите во вся веки.

И ныне: Се Сын Твой Богородице, пленив Крестом Своим смерть, воскрес тридневен, и учеником Своим явлься, востече к небесным: с нимиже Тебе покланяющися поем и славословим во вся веки.

Таже, Хвалим, благословим, покланяемся:

**Катавасия:** Разрешает узы, и орошает пламень, \* трисветлый Богоначалия Образ: \* поют отроцы, благословит же Единого Спаса \* и Вседетеля, яко Благодетеля \* сотворенная всяческая тварь.

Честнейшую: не поем, но поем припев:

Величай душе моя, Вознесшагося от земли на небо, Христа Жизнодавца.

Песнь 9.

**Ирмос:** Тя паче ума и словесе Матерь Божию, \* в лето Безлетнаго \* неизреченно рождшую \* вернии единомудренно величаем.

**Тебе** Избавителя мира Христа Бога, апостоли видяще Божественно возвышаема, со страхом играюще величаху.

**Твою** обожившуюся плоть зряще Христе, на высоте ангели, друг ко другу глаголаху: воистинну Сей есть Бог наш.

**Тебе** безплотных чинове Христе Боже, на облацех вземлема видяще, зываху: славы Царю врата возьмите.

**Тебе** сошедшаго даже до последних земли, и человека спасаго, и восхождением Твоим возвысившаго, Сего величаем.

**Богородичен:** Радуйся Богородице Мати Христа Бога: Егоже родила еси, днесь от земли возносима со апостолами зрящи, возвеличала еси.

**Ин.**

**Вторый припев:** Ангели восхождение Владыки зряще ужасавшася, како со славою взятася от земли на горняя.

**Ирмос:** Всяк земнородный ...,

**О** даров паче постижения! О таинства страшнаго! Всеми бо владычествуяй, от земли отходя к небесным, учеником посла Духа Святаго, просветившаго сих смысл, и огненны сотворившаго благодатию.

**Полцы** ученичестии, Господь рече, вы седите во Иерусалиме: и Аз низпослю вам Утешителя другаго, Отцу сопредельна и Мне равночестна, Егоже видите взимаема, и облаком светлым носима.

**Взятася** яже великолепие выше небес, плотию обнищавшаго, и соседением Отца почтесе естество наше отпадшее: торжествуим, и согласно вси воскликнем, восплещим руками радующеся.

**Богородичен:** Свет от Света возсиявый Всенепорочная, из Тебе возсия, и черноту безбожия всю разруши, и в ноци спящих просвети. Сего ради вси по долгу Тя во веки присно ублажаем.

**Катавасия:** Радуйся Царице, \* Матеродевственная славо: \* всяка бо удобообращательная \* благоглаголивая уста витийствовати не могут, \* Тебе пети достойно: \* низумевает же ум всяк, Твое Рождество разумети. \* Темже Тя согласно славим.

**Ексапостиларий самогласен:**

**Учеником** зрящим Тя, вознесся еси Христе ко Отцу соседя, ангели предтекуще зовяху: возьмите врата, возьмите, Царь бо взыде к начальному Свету славы. [Трижды.]

**На хвалитех, Всякое дыхание:** стихи 4 и поем стихиры, глас 1-й:

**Подобен:** Небесных чинов:

**А**нгельски иже в мире торжествуим, на престоле славы Богу носимому, взывающе пение: Свят еси Отче небесный, Сприсносущный Слове, Свят еси и Душе Всесвятый. [Дважды.]

**Н**ачальницы ангелов смотряюще, Спасе, восхождения странное, недоумевахуся друг ко другу: что видение сие? Человек убо зраком видимый, якоже Бог, превыше небес с плотию восходит.

**Г**алилеане зряще Тя Вознесенна, от Масличныя горы с телом Слове, слышаху ангелов вопиющих им: что стоите зряще? Сей приидет паки с плотию, имже образом видесте.

**Слава, и ныне, глас 2-й:**

**Р**одился еси яко Сам восхотел еси, явился еси яко Сам изволил еси: пострадал еси плотию Боже наш, из мертвых воскресл еси поправ смерть. Вознеслся еси во славе, всяческая исполняяй, и послал еси нам Духа Божественнаго, еже воспевати и славити Твое Божество.

**Славословие великое.**

**Отпустительный тропарь, глас 4-й**

**В**ознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира.

**Дается и святой елей братии. И поучение Студитово. И час 1-й в притворе. И совершенный отпуст.**

## НА ЛИТУРГИИ

Поём настоящя антифоны, псалом 46, глас 2:

**Стих 1:** **В**си языцы восплещите руками, \* воскликните Богу гласом радования.

**Запев:** **М**олитвами Богородицы Спасе спаси нас.

**Стих 2:** **Я**ко Господь Вышний страшен, \* Царь велий по всей земли.

**Запев:** **М**олитвами Богородицы Спасе спаси нас.

**Стих 3:** **П**окори люди нам \* и языки под ноги наша.

**Запев:** **М**олитвами Богородицы Спасе спаси нас.

**Стих 4:** **В**зыде Бог в воскликновении, \* Господь во гласе трубне.

**Запев:** **М**олитвами Богородицы Спасе спаси нас.

**Слава, и ныне:** **М**олитвами Богородицы Спасе спаси нас.

Антифон 2, псалом 47, глас 2.

**Стих 1:** **В**елий Господь и хвален зело, \* во граде Бога нашего в горе святей Его.

**Запев:** **С**паси нас Сыне Божий, Вознесыйся во славе, поющя Ти: Аллилуиа.

**Стих 2:** **Г**оры Сионския, ребра Северова, \* град Царя великаго.

**Запев:** **С**паси нас Сыне Божий, Вознесыйся во славе, поющя Ти: Аллилуиа.

**Стих 3:** **Б**ог в тяжестех Его знаемь есть, \* егда заступает и.

**Запев:** **С**паси нас Сыне Божий, Вознесыйся во славе, поющя Ти: Аллилуиа.

**Стих 4:** **Я**ко се царие земстии собрашася, \* снидошася вкупе:

**Запев:** **С**паси нас Сыне Божий, Вознесыйся во славе, поющя Ти: Аллилуиа.

**Слава, и ныне:** **Е**динородный Сыне:

Антифон 3, псалом 48, глас 4.

**Стих 1:** **У**слышите сия вси языцы, внушите вси живуции по вселенней.

Тропарь, глас 4-й

**В**ознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира.

**Стих 2:** Земнороднии же и сынове человечестии, вкупе богат и убог.

**Тропарь:** Вознеслся еси во славе:

**Стих 3:** Уста моя возглаголют премудрость, и поучение сердца моего разум.

**Тропарь:** Вознеслся еси во славе:

**Стих 4:** Приклоню в притчу ухо мое, отверзу во псалтири ганание мое.

**Тропарь:** Вознеслся еси во славе:

**Входный:** Взыде Бог в воскликновении, Господь во гласе трубне.

**Тропарь, глас 4-й:**

**Вознеслся еси во славе Христе Боже наш, \* радость сотворивый учеником \* обетованием Святаго Духа, \* извещенным им бывшим благословением, \* яко Ты еси Сын Божий, Избавитель мира.**

**Слава, и ныне: Кондак самогласен, глас 6-й:**

**Еже о нас исполнив смотрение, и яже на земли соединив Небесным, Вознеслся еси во славе Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.**

**Таже трисвятое.**

**Прокимен, глас 7:** Вознесися на небеса Боже, и по всей земли слава Твоя.

**Стих:** Готово сердце мое Боже, готово сердце мое: воспою и пою во славе моей.

**Апостол в деяниях, зачало 1:**

**Первое убо слово сотворих о всех, о Феофиле, яже начат Иисус творити же и учити даже до дне, вонъже, заповедав апостолом Духом Святым, ихже избра, вознесся. Пред нимиже и постави Себе жива по страдании Своем во мнозех истинных знамениих, деньми четыредесятьми являясь им и глаголя яже о Царствии Божии: С нимиже и ядый, повеле им от Иерусалима не отлучатися, но ждати обетования Отца, еже слышасте от Мене: Яко Иоанн убо крестил есть водою, вы же имате креститися Духом Святым не по мнозех сих днех. Они же убо сошедшеся, вопрошаху Его, глаголюще: Господи, аще в лето сие устроиши царствие Израилево? Рече же к ним: несть ваше разумети времена и лета, яже Отец положи во Своей власти. Но примете силу, нашедшу Святому Духу на вы, и будете Ми свидетелне во Иерусалиме же и во всей Иудеи и Самарии, и даже до последних земли. И сия рек, зрящим им, взявся, и облак подъят Его от очию их. И яко взирающе бяху на небо, идущу Ему, и се мужа два стаа пред ними во одежди беле. Яже и рекоста: мужие Галилейстии, что стоите зряще на небо? Сей Иисус, вознесыйся от вас на небо, такожде приидет, имже образом видесте Его идуща на небо. Тогда возвратишася во Иерусалим от горы нарицаемая Елеон, яже есть близ Иерусалима, субботы имущия путь.**

Аллилуиа, глас 2-й: Взыде Бог в воскликновении, Господь во гласе трубне.

Стих: Все языцы восплещете руками, воскликните Богу гласом радования.

Евангелие Луки, зачало 114:

Во время оно, воскрес Иисус от мертвых, и ста посреде ученик Своих, и глагола им: мир вам. Убоявшеся же и пристрашни бывше, мняху дух видяще. И рече им: что смущени есте; и почто помышления входят в сердца ваша? Видите рuce Мои и нозе Мои, яко Сам Аз есмь. Осяжите Мя и видите, яко дух плоти и кости не имать, якоже Мене видите имуща. И сие рек, показа им рuce и нозе. Еще же не верующим им от радости и чудящимся, рече им: имате ли что сядно zde? Они же даша Ему рыбы печены часть, и от пчел сот. И взем, пред ними яде. Рече же им: сия суть словеса, яже глаголах к вам еще сый с вами, яко подобает скончаться всем написанным в законе Моисеове и пророцех и псалмех о Мне. Тогда отверзе им ум разумети Писания. И рече им: яко тако писано есть, и тако подобаше пострадати Христу, и воскреснути от мертвых в третий день, и проповедатися во имя Его покаянию и отпущению грехов во всех языцех, наченше от Иерусалима. Вы же есте свидетелие сим. И се, Аз пошлю обетование Отца Моего на вы: вы же седите во граде Иерусалимсте, дондеже облечетесь силою свыше. Извед же их вон до Вифании, и воздвиг рuce Свои, и благослови их. И бысть егда благословляше их, отступи от них и возношашеся на небо. И тии поклонишася Ему и возвратишася во Иерусалим с радостию великою: И бяху выну в церкви, хваляще и благословяще Бога. Аминь.

За Достойно, поем и до отдания ирмос:

Величай душе моя, Вознесагося от земли на небо, Христа Жизнодавца.

**Ирмос:** Тя паче ума и словесе Матерь Божию, в лето Безлетнаго неизреченно рождшую вернии единомудренно величаем.

Причастный: Взыде Бог в воскликновении, Господь во гласе трубне.

Аллилуиа [трижды]

На трапезе велие утешение братии.